


**SENIOR CERTIFICATE
EXAMINATION
*SENIORSERTIFIKAAT-EKSAMEN***



**FEBRUARY / MARCH
*FEBRUARIE / MAART***

2007

**SETSWANA PUO YA
NTLHA
SEEMOGODIMO**

Pampiri ya Ntlha

SETSWANA PRIMARY/FIRST LANG HG: Paper 1

HG

117-1/1



**7 pages
7 bladsye**

**COPYRIGHT RESERVED / KOPIEREG VOORBEHOU
APPROVED BY UMALUSI / GOEDGEKEUR DEUR UMALUSI**



**LEFAPHA LA THUTO LA GAUTENG
TLHATLHOBO YA MAKGAOLAKGANG**

**SETSWANA PUO YA NTLHA
SEEMOGODIMO
(Pampiri ya ntlha)**

NAKO: diura tse 2½

MADUO: 100

DITAELO:

- Pampiri e, e arogantswe ka dikarolwana di le tharo e leng A, B le C.
 - Karolo nngwe le nngwe e na le dipotso tsa yona.
 - Se fetole dipalo tsa dipotso.
 - Araba dipotso tsotlhe ka Setswana.
-
-

**KAROLO YA A
TEKATLHALOGANYO**

POTSO 1

Buisa temana e e latelang; mme morago o arabe dipotso tse di e latelang:

"Bafedile, tota o ya go simolola leng go ithuta fa mpuru a setse a faretse jaana? Ga ke bolo go hupela, pelo ya me e elela kgodu e khibidu fa ke gopola kwa nna le wena re tswang teng – malatsi a rona a bonyane mmogo, malatsi a rona le ditsala tsa rona; re tshega, go le monate. Gompieno o fetogile, ga ke itse ..."

E ne e se ka maikaelelo go a digela, fela sengwe sa mo bipa kgokgotso: ya ne e kete a ka ngaa jaaka losea. Boitumelo a didimala sebakanyana, tlhaloganyo e boitse morago. A fofile malatsi! Setshwantsho sa basetsanyana ba tshameka mmogo se ne se katositse tsotlhe tsa motsotso oo. A boela a eletsa go tswela pele a kgala tsala, fa Bafedile a mo tswala molomo ka wa gagwe. "O a re ke go ratela eng tsala ya me ya seinong, fa e se tlhaloganyo eo ya gago. O tota o opile kgomo lonaka. Maloba fa re ne re le banyana re ne re tshameka, re tlolaka, re senyaka mme re dira tsotlhe tsa bonyana. Go ne go le monate, go se 'tsapa le fisang pelo. Mpolelele gee gore jaaka re setse re le mo mophatong wa bo-lesome jaana, re setse re ka tsewa, a re tswela ka go ipitsa bana? Nnyaa Boitumelo, nna ke mogodi. Ke gata, ke bo ke tsena ka fa go tsenang bagolo teng.

Basetsana ba babedi ba godile mmogo kwa motseng wa Marapyane. Bafedile o tsamaisitse loeto lwa botshelo ke mosadi wa moitshodi dinyaga di le somerobong, nnyaa fa ke akanya sentle di ne di le lesome. Le fa mmaagwe a sa le a tlogelwa ke molekane wa gagwe botshelo jwa bona bo sa tswa go simolola, o ne a supa letsatsi gore mamphorwane a gagwe ga a kitla a ikwatlhela go lerwe mo

lefatsheng, le fa ba ne ba ka a tlhomaganya ba tlhoka letswainyana mme boemong ba hupela ka metsi. O ne a kile a tlelwa ke kakanyo ya kgakakgolo fa e ne e boleetse basotli puo phaa gore yona fa e sena mebala e e ka ipelang ka yona mebala eo e ka fitlhelwa kwa dikgakaneng.

Motsadi a tshwara tau ka mangana, a ngapangapela Bafedile le Gontse. Molao ka fa 'lapeng re fitlhela wa ga Bile, e se re gongwe isagwe a lelele kgama le mogogoro a se kile a a duba a sa le metsi.

Maitsiboa a e ne e le a bofela fa barutwana ba sekolo sa dithuto tse di kwa godingwana sa Tlhabologang ba bona sebaka sa go ya go ikgopotsa dithuto tse ba tsenelang ditlathobho tsa tsona. Go ne go le makgaphilakgaphila, kwa matloborobalong a basetsana e ne e le semphete ke go fete. Ka tebo ya matlho motho a kgona go bona gore ruri motsetse o ja ka seatla. E rile go tlatsa legaba ba latlhela megopo kwa motsheo ba gopotse dikwalo.

Ditlhako tsotlhe; le gale e seng tsotlhe bagaetsho, di ne di lebile kwa ntlo lehalahaleng kwa go ithutelwang gona, maoto a le bofefo. Motho a fete a eme lobaka lo le mopane fa kgorong gore a tle a kgone go latlhela bofoku ka fa gare go bona gore tsala e nnetse kae, mme a kgone go ka e katoga, gore a se thanye lo le tsebeng.

***Mantswe a a robong: O thantse lo le tsebeng
R.J. Makgeledise***

- 1.1 Bafedile le Boitumelo ba tsalana jang? Gona ba godile mmogo kwa motseng ofe? (2)
- 1.2 Fa leina la sekolo le mophato o basetsana ba neng ba le mo go ona. (2)
- 1.3 Bafedile ena o tsalwa le mang? (1)
- 1.4 Goreng Boitumelo a re, 'mpuru o faretswe'? (2)
- 1.5 Kwala dilo di le PEDI tse ba neng ba di dira mmogo fa ba le banye. (2)
- 1.6 Goreng Boitumelo a ne a batla go ngaa jaaka losea morago ga gore a didimatswe? (2)
- 1.7 Ke eng se Bafedile a neng a se rata bobbe ka ga tsala ya gagwe? (1)
- 1.8 Fa Bafedile a re, 'ba lekane go ka tsewa' o raya jang? (2)
- 1.9 Setlega ntlha e e reng, 'molao kwa lapeng lwa ga bo-Bafedile e ne e le wa Bile,' ka lebaka le le tlhabosang. (2)
- 1.10 Naya dikakanyo di le PEDI go tswa mo temaneng, tse moitshodi yo, a neng a akanya ka tsona fa a godisa bana ba gagwe. (4)

1.11 Tlhalosa dipolelo tse di latelang ka botlalo go ya ka tiriso ya tsona mo ditemaneng tse di fa godimo.

1.11.1 Fa mpuru a faretse (2)

1.11.2 Go digela. (2)

1.11.3 Go se tsapa le fisang pelo. (2)

1.11.4 Kgakakgolo ga e na mebala, mebala e fitlhelwa dikgakaneng. (2)

1.11.5 Go thanya lo le tsebeng. (2)

MADUO A KAROLO YA A: [30]

**KAROLO YA B
TSHOSOBANYO**

POTSO 2

Buisa temana e e latelang ka kelotlhoko, mme morago o e sosobanye ka temana e e ka nnang le dintlha di le lesome: O netefatse gore bokao ga bo fetoge.

Baitseanape ba saense ba tlhalosa gore khokheine e dirwa go tswa mo mofuteng mongwe wa semela mme dingaka di o dirise jaaka seidibatsi sa bona sa maitirelo. Bogale ba khokheine bo fetola motho lekgoba fa fela a sena go e tsuba gangwe fela. Maitemogelo a rutila diopedi gore di gakololane mme di ikgatholose tiriso e e bosutlha e ya seritibatsi se. Go bonagala fa e le maaka a matala gore se ka kgontsha seopedi go opela jaaka go kaiwa. Diopedi di itemogetse gore fa o ka fetoga lekgoba la seritibatsi se, o ipona o le morena wa lefatshe mme o senyegelwa ke madi ao o ka iphitlhelang o rekisitse le motho yo o mo ratang tota. Badirisi ba khokheine ba e kaya jaaka mowa o o rileng, o o reng o go tsene o be o batla go nnela ruri mo go wena.

Kgakololo go badirisi ba seritibatsi se se kotsi se, ke gore e dirile gore mmimo wa mono gae o gogobe kwa tlase. Le gona se se rothisang pelo madi ke gore barekisi bano ba ba tlhagang dinageng tse di kwa ntle ba koafatsa le ikonomi ya naga gore ba kgona go dira madi a ka nnang diranta di le makgolo a le mane (R400,00) ka letsatsi mme ba a ise mafatsheng a bona. Se segolo ke gore batho ba Aferika Borwa ba tshwanelwa ke go ipopa ngata e le nngwe mme ba lwantshe barekisi ba diritibatsi pele ba senya naga e ntle e ya rona.

Fofelang godimo – N.P. Senne

MADUO A KAROLO YA B: [10]

**KAROLO YA C
TIRISO YA PUO**

POTSO 3

Buisa ditemana tse di latelang, mme morago o arabe dipotso tsa thutapuo go tswa mo go tsona.

Ditsheko o ne a sa nosane metsi le Lerue, mme ntswa pele ba ne ba ntshana seinong. E rile tsatsi lengwe, Lerue a tswa diphafaneng, a tlhapatse Ditsheko mo go maswe, a mo tsola ditswalo a ba a mmolelela se mmaagwe o se jeleng ka tlala. Batho ba sulafala dipelo go utlwa matlhapa a a neng a tswa ka ditlhaa tsa ga Lerue. Mafoko a ga Lerue a tlhaba Ditsheko jaaka lerumo, mme a retelelwa ke go a itshokela, a isa Lerue diatla, a mo ikadima. E rile fa Lerue a bona gore Ditsheko o a mo imela a tlhanola direthe, a inaya naga. Batho ba swa ka ditshego jaaka ba bona Lerue a sa taboge, a thuntshitse dithole. Ba lemoga gore Ditsheko ke tau, ga a tshamekelwe.

E rile ka letsatsi le le latelang, molato wa bona wa ya kgotla. Fa banna ba ntse ba amogana mafoko jaaka e kete ba suga letlalo la phudu-hudu, ga ema Podile, a re, "Barolong, ke tla bua mafatla a me malebana le kgang e. Lekgotla ga le tlhoe motho, le tlhoa molato. Rotlhe re itse gore Lerue ke nta ya selomela-kobong. Ke ena yo o tsamayang a hupa diphafana ka Ditsheko ka a bona a itsholetse, mme ena a se na matsogo a go ingapangapela." Ga ema Molefinyane wa Mailantwa, mme a tlhaba Podile ka matlho, a re, "Mogolole, e re o bua o tlhophe mafoko a gago gone tsa bana ba mpa ga di tsenwe. E ka re ka moso wa tsoga o di emaema, mme wa di gama o sa di tlhapela. Ga o itse gore sebi se kuke-ditswe ke eng." "Ke sa go tsene ganong, morwarra," ga bua Thipe wa Matsaakgang, "mmuakgotleng ga a tlhoe motho, o tlhoa molato, jaaka rre Podile a setse a buile. Rre Podile o a bua, mme ke tshwanelo gore lekgotla le mo adime ditsebe, go tsamaya a swetsa puo ya gagwe."

Morago ga lobakanyana ga ema Ditsheko, a re, "Borra, nna tota ga ke itse gore Lerue o ntoketse eng logong ka fa maragong; le se ke se mo jetseng ga ke se itse." "Ke batla madi a me mo tlhogong eo ya gago," ga bua Lerue. Lekgotla la mo kgalemela, gore fa e re a bua a se ka a itlhomomela, a ka nna a jelwa kgomo yosi fela.

Setswana sa lowe – J. Malao.

3.1 Dirisa mafoko a a latelang mo dipolelong tse di tlhabosang go supa bokao jo bo farologaneng le jo bo mo temaneng:

3.1.1 Tlala

(2)

3.1.2 Tlhaba

(2)

- 3.2 Dirisa matlhophi a a latelang mo dipolelong tse di tlabosang.
- 3.2.1 Rotlhe. (1)
3.2.2 Yosi. (1)
- 3.3 Fa malatodi a mafoko a a thaletsweng, mme morago o a dirise mo dipolelong:
- 3.3.1 Tsamayang lo di boele kgakala. (2)
3.3.2 O tla bua gore batho ba go utlwe. (2)
- 3.4 Naya makaelagongwe a mafoko a a latelang, mme morago o a dirise mo dipolelong tse di tlabosang.
- 3.4.1 Madi. (2)
3.4.2 Bona. (2)
- 3.5 Fa bongwe ba mafoko a a latelang mme morago o a dirise mo dipolelong.
- 3.5.1 Dithole. (2)
3.5.2 Ditshego. (2)
- 3.6 Fetola di kutu tsa madiri a a latelang, ka go tlhoma setlhongwa sa popi ya leitiri, mme morago o a dirise mo dipolelong:
- 3.6.1 Tlhoa. (1)
3.6.2 Kgalema. (1)
- 3.7 Dirisa maina a a latelang jaaka matlhalosi mo dipolelong tse di tlabosang:
- 3.7.1 Diphafaneng. (1)
3.7.2 Lobakanyana. (1)
- 3.8 Dirisa mainatswako a a latelang mo dipolelong tse di tlabosang.
- 3.8.1 Selomelakobong. (1)
3.8.2 Mmuakgotleng. (1)
- 3.9 Tlhalosa maele a a latelang:
- 3.9.1 go tsola ditswalo. (2)
3.9.2 go tlhanola direthe. (2)
3.9.3 go tsena ganong. (2)
- 3.10 Bopa seane se le sengwe fela ka mafoko a a latelang:
- 3.10.1 Kgomo. (2)
3.10.2 Motho. (2)

- 3.11 Bopa madirimatswa a thitotiri – tlhaba, ka go gokelela megatlana e e fa tlase:
- 3.11.1 -ela (1)
3.11.2 -isa (1)
- 3.12 Nopola madiri a paka – jaanong le tirwa mo dipolelong tse di latelang:
- 3.12.1 Rre podile o tla bua le fa a se na a mantsi. (1)
3.12.2 A ka nna a jelwa kgomo fa a sa utlwe. (1)
- 3.13 Naya mediriso e e tlhagelelang mo dipolelong tse di fa tlase:
- 3.13.1 Ke ena yo o tsamayang a hupa. (1)
3.13.2 Lekgotla ga le tlhoe motho, le tlhoa molato. (1)
- [40]**

POTSO 4

- 4.1 Buisa temana e e latelang, mme morago o siamise diphoso tsa mopeleto, kgaoganyo ya mafoko, ditlhaka tse dikgolo, o tsenye le matshwao a puiso fa go tshwanetseng.
- fa a fitlha teng, a feta a ikgatlhantsha le molatlhwa le bogolwane ba motse erile fa ba le mo phuthegong letsholo a re borra ke fano ke lateletse motlhala wa mosimane yo e leng khoshi ya mo rafe wa lona. 1x10=(10)
- 4.2 Bopa dipolelo ka mafoko a o a filweng fa tlase. Netefatsa gore polelo nngwe le nngwe e o e bopileng e na le bokao.
- 4.2.1 Ya, mafisa, ba basimane, gama, kgomo
4.2.2 Sentse thata e kwa, Asia, tsunami, bokone, botlhaba, ba,
4.2.3 Botšarara, ja ba, bana, maungo, a, a.
4.2.4 Kgolo, o, ntlo, e, ikagetse, rrangwane.
4.2.5 Thapama, ba, setlhotšhwana, ba, le, gorogile. 5x2=(10)
- [20]**

MADUO A KAROLO YA C: [60]

PALOGOTLHE: 100